

Don Bosco nia mehi misionáriu sira

Iha Don Bosco, ideál misionáriu sai buras hamutuk ho ninia vokasaun saserdotál. Ninia aspirasaun misionária antiga, ne'ebé iha tinan sira Semináriu nian dudu nia atu estuda españól uitoan, nunka lakon (kf. MB X, 55). Nia iha relasaun forte amizade nian ho fundadór institutu relijiozu misionáriu sira no misionáriu sira ne'ebé nakonu ho laran-manas hanesan, n.e., P. Daniele Comboni, ne'ebé iha 1864 sai bainaka iha Oratóriu Valdocco nian hodi halakan ho entuziazmu foin-sa'e hotu ba kauza misionária (kf. MB VIII 825-826) .

D. Bosco hateten: "Se ha'u iha joven 12 iha-ne'ebé ha'u mak na'in ba sira no bele halo sira hanesan buat ne'ebé ha'u halo ho lensu oan ne'e, ha'u hakarak lori Kristu nia naran ba rai dodook sira" (MB IV 424) .

Bainhira ninia Sociedade hetan aproovasaun ofisiál, nia realiza ninia ideál misionáriu, ne'ebé hetan apoiu la'ós de'it husi "mehi sira" ne'ebé estimula nia atu evangeliza povu deskoñesidu sira, maibé liuliu hodi Maromak nia kbiit no Maria Tulun-Na'in nia protesau, aleinde ninia "espíritu misionáriu".

Loloos Don Bosco atu hahú misaun iha Hong Kong. Maibé tanba labele hala'o nia hateke ba América Latina.

Depoizde vizita husi konsul Argentina nian, komendadór João Gazzolo, ba Oratóriu Valdocco nian, obra saleziana hahú projeta an ba horizonte misionáriu boot hahú husi Argentina.

Liña misionária rua evidente iha Don Bosco nia projetu misionáriu: imigrante italianu sira no foin-sa'e sira ne'ebé presiza edukasaun no evangelizasaun.

Iha 14 Novembru 1875, misionáriu salezianu na'in sanulu ba dala uluk embarka iha Genova no liutiha fulan ida sira to'o iha Buenos Aires iha-ne'ebé fofoun sira tau matan ba emigrante italianu sira, hafoin rai-na'in sira, hodi ba to'o Patagónia.

Tempu ne'ebá akontese emigrasaun italiana boboot iha Argentina no klase dirigente América nian favorese Kongregasaun sira mai husi li'ur atu dedika an ba joven sira nia edukasaun.

Itália, rai ba misionária/u lubun boot, moris tensaun entre Estadu no Igreja, maibé laiha influénsia polítika iha nivel internasionál, nune'e misionáriu sira la hetan konsiderasaun nu'udar kolonizadór.

Mehi misionáriu dahuluk Don Bosco nian, kona-ba Patagónia, akontese iha 1872 (kf. MB X 53-54. 1267-1268). Nune'e, Institutu FMA, ne'ebé harii iha 5 Agostu 1872, soi marka entuziazmu no intensionalidade misionária Fundadór nian no ninia kolaboradór dahuluk sira. Buat ne'e evidente bainhira ita lee ho atensaun D. Bosco nia surat dahuluk sira ba misionáriu salezianu sira.

Iha surat dahuluk ne'ebé nia haruka iha inísiu 1876 ba P. Cagliero, ne'ebé bá América iha Novembru 1875, ita hetan promesa extraordinária ida:

"Hanoín bá katak iha fulan Outubru ami sei haruka FMA na'in tolunulu hamutuk ho Salezianu na'in snaulu nune'e; se urjente karik, balun sei bá molok" (Surat iha Janeiro 1876, iha E III 11).

Entre 1876 no 1888 regista espedisaun misionária 10 ne'ebé haruka pesoál liuliu atu funda sentru misionáriu sira iha Patagónia, Argentina, Uruguai, Brasil, Chile no Equador. Iha fatin hotu salezianu sira loke oratóriu, parókia, koléjiu ba estudante no artezaun, orfanatu, gráfika no livraria sira.

D. Bosco, realiza ninia hakaran misionáriu liuhusi dalan oioin hanesan, hodi haruka espedisaun misionária, husi 1875, tinantinan; halakan iha joven sira no salezianu sira laran-manas atu habelar Evanjellu; loke fundasaun misionária iha nasaun oioin; habelar sensibilidade misionária liuhusi Bolettino Salesiano, hodi buka rekursu no kuda relasaun sira ne'ebé tulun obra misionária.

Ita hatene katak Don Bosco iha mehi barak iha nia moris, 5 husi mehi sira-ne'e mak mehi misionáriu.

- 1872 – mehi misionáriu dahuluk (Patagónia);
- 1883 - mehi misionáriu (América)
- 1885 - mehi misionáriu datoluk (viajen aérea);
- 1885 - mehi misionáriu dahaat (Áfrika no China);
- 1886 - mehi misionáriu dalimak (Bibi-atan feto);

Mehi dahuluk – Ho data 1872, ba dala uluk nia konta mehi ne’e ba Pio IX, iha Marsu 1876; hafoin, nia konta mós ba salezianu ruma. «Parese, nia dehan, katak ha’u iha rejiaun fuik ida no la koñese totalmente. Nia mak rai-tetuk ida ne’ebé la kuda buat ida, la haree foho ki’ik no foho boot. Maibé iha dook liu, foho meik mak hale’u. Ha’u haree ema lubun boot ne’ebé la’o iha ne’ebá. Sira kuaze molik, estatura estraordinária, ho oin siak, ho fuuk hamriik no naruk, mean no metan, hatais mantu naruk halo ho balada nia kulit, tabele iha kotuk. Sira iha kilat hanesan diman no fisga... Mehí ne’e marka profundamente ha’u, ba ha’u nu’udar avizu ida husi lalehan...».

Foufoun Don Bosco hanoin katak sira mak povu Etiópia nian, hafoin nia hanoin Hong Kong, depois povu sira Índia nian; iha 1874 de’it, bainhira nia simu konvite insistente atu haruka salezianu sira ba Argentina, mak nia komprende momoos katak ema fuik sira nia haree iha mehi mak rai-na’in sira husi rejiaun boot ne’e, tempu ne’ebá seidauk koñese, katak Patagónia.

Mehi daruak – Mehí misionáriu daruak Don Bosco haree iha San Benigno Canavese iha 1883, mak representasaun alégorika, riku ho elementu profétiku kona-ba misaun saleziana sira nia futuru iha Amérika Súl. D. Bosco haktuir mehi ne’e iha loron 4 Setembru ba membru sira Kapítulu Jerál da-3... Nia remata konta mehi ne’e hodi dehan:

«Ho S. Francisco de Sales nia laran-midar, Salezianu sira sei lori Jezús Kristu ba povu sira Amérika nian. Sei sai difisil moraliza ema fuik sira, maibé sira-nia oan sira sei obedese fasilmente Misionáriu sira nia liafuan, no ho sira-ne’e, sei harii kolónia sira, sivilizasaun sei foti hahalok fuik nia fatin no ho modu ne’e ema fuik barak sei halo parte Jezús Kristu nia luhan».

Mehi datoluk – Besik daudaun ba espedisaun misionária 1885 nian ho Salezianu na’in 18 no FMA na’in 6. Don Bosco preokupadu tanba labele despede malu ho sira iha igreja Maria Ausiliadora nian, hanesan tinan sira molok, basá doutór sira fó konsellu atu nia deskansa ho totál.

No iha kalan entre 31 Janeiro no 1 Fevereiro, Na’i konsola nia ho mehi misionáriu datoluk, nu’udar viajen semu fantáztiku ida, bainhira tempu ne’ebá seidauk ko’alia kona-ba viajen aérea.

«Hanoín prinsipál ne'ebé hela metin iha ha'u liutih amehi ne'e mak fó avizu ida importante liu ba padre Cagliero no ha'u-nia misionáriu doben sira, kona-ba futuru ita-nia Misaun sira-nian: "Salezianu sira no Filhas de Maria Auxiliadora nia atensaun tomak tenke fó ba promosaun vokasaun ekleziástika no relijioza sira"».

Mehi dahaat – Providénsia la para atu foti véu futuru nian iha D. Bosco nia oin kona-ba Kongregasaun Saleziana nia dezenvolvimentu iha kampu laho limite Misaun sira-nian. Iha 1885 mós, mehi ida revela Maromak nia planu kona-ba futuru. D. Bosco konta no komenta mehi ne'e ba membru sira Konsellu Jerál nian iha kalan 2 Jullu nian. «Entaun, ha'u hanesan iha sentru Áfrika nian, iha rai-fuik maran luan liu. Ha'u hanoín katak ne'e hotu hatudu katak Providénsia oferese baluk ida kampu evanjéliku nian ba Salezianu sira, maibé iha tempu futuru. Sira-nia esforsu sei fó fuan, basá Na'i nia liman hamutuk nafatin ho sira, se sira la halakon méritu ba Ninia favór sira. Ema sei hateke ho matan di'ak, husi ema aat sira mós, tanba ita-nia misaun espesiál liu nune'e konsege dada ema hotu nia simpatia, husi ema di'ak no ema ladún di'ak.

Karik iha emaulun bulak ruma ne'ebé hakarak harahun ita, maibé ne'e projetu izoladu, laho ema seluk nia apoiu.

Buat hotu depende oinsá salezianu sira la husik atu komodidade sira manán sira, atu halai husi serbisu». D. Bosco fihir ho atensaun partikulár ba China no hateten: «Se ha'u iha salezianu na'in 20 atu haruka ba China, konserteza ema sei simu sira ho triunfu, maski iha persegisaun ne'e hotu nia laran».

Mehi dalimak - D. Bosco mehi iha Barcelona mehi ne'e iha kalan 9 ba 10 Abríl 1886. Nia konta ba Padre Rua, ba Padre Branda, diretór Uma nian, no ba sekretáriu, Padre Vighetti, ho lian nakdedar.

Durante kalan 9 ba 10 Abríl 1886, D. Bosco iha mehi misionáriu misteriozu seluk. Nia hanesan besik uma ne'ebé nia moris, iha Castelnovo, iha foho-oan ida hanaran «Foho-oan tua nian». Husi nia leten haree buat hotu. No lakleur, ha'u rona hakilar no tarutu labarik lubun boot ida-nian.

Lakleur nia haree sira iha nia oin halai hasoru nia hodi hakilar: «Ami hein ó kleur loos, agora ikusmai ó to'o duni no ami sei la halai husi ami». Don Bosco haree ba sira no husu ba sira sá mak sira hakarak husi nia.

Besik ba fatin sira horik bá, mosu bibi luhan ida ne'ebé bibi-atan fetoraan ida mak hein, hodi haketak bibi-timur husi bibi-malae sira, para iha nia oin no dehan ba nia: «Haree buat ne'ebé iha ó-nia oin. Di'ak: hanoin mehi ne'ebé ó iha bainhira tinan sira». Ho hamnasa ida nia halo labarik sira hakbesik Don Bosco no dehan ba sira: «Agora hateke ba sorin ne'e; foti matan bá. Eh di'ak liu, imi hotu foti matan atu lee sá mak hakerek. Saida mak imi haree?» «Ha'u haree foho sira, tasi sira no foho seluk no tasi selu-seluk», Don Bosco hatán. «Ha'u lee Valparaíso» labarik ida dehan. «No ha'u, Santiago» seluk hatán. «Agora – Bibi-atan fetoraan ne'e kontinua – fila no hateke ba sorin seluk ne'e». «Ha'u haree foho sira, foho-oan sira no tasi sira», Don Bosco hatán. «ami lee Pequim», labarik sira hateten. No Don Bosco haree sidade ida iha-ne'ebé mota boot ida fahe no iha nia leten iha ponte boboot. «Di'ak», Bibi-atan fetoraan nobre no furak ne'ebé hanesan joven sira-ne'e hotu nia inan. Hafoin nia hatutan: «Agora, dada kabas ida husi tutun ida ba tutun seluk, husi Pequim to'o Santiago; iha nia klaran iha Áfrika, no ó sei iha ideia loloos kona-ba sá mak ó-nia salezianu sira tenke halo». «Maibé oinsá bele halo buat sira ne'e hotu?» - Don Bosco hatán. «Distánsia sira boot, fatin sira susar atu to'o; salezianu sira uitoan...».

«Keta laran susar. Ó-nia oan sira mak sei halo no ó-nia oan sira nia oan no sira-nia oan tan; maibé buka rai di'ak ó-nia Kongregasaun nia espírito». Hafoin, ho hateken kle'an ida, Bibi-atan fetoraan hatutan: «Hahú tau laran tomak. Presiza halo de'it buat ida: hameno ba ó-nia oan sira atu kuda ho konstánsia Virjen Maria nia virtude». «Di'ak – Don Bosco konklui – ha'u sei dehan liafuan sira-ne'e ba sira hotu».

«Maibé, tau atensaun ba sira ne'ebé estuda siénsia divina sira, basá siénsia Lalehan nian labele kahur ho sasán sira rai nian». Teki-teki buat hotu lakon. Don Bosco la haree tan buat seluk. Bainhira nia konta ba dala uluk mehi ne'e, iha amlulik balun hale'u nia ne'ebé ora-oras hateten: «Oh, Na'i-Feto!» No Don Bosco reforsa: «Nia hadomi ita. Nia ita-nia Inan».

